

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....subi sin miedu paso sinterklaas i zwarte piet no por hinka niun hende den saku mas. Nan fiesta a pasa i awor ta sigui konsentrá pa prepará pa Pasku. Nos ta den atvent i ya ta bai sende nos di 2 bela mañan ku Dios ke. Na kantor aki tur djaluna tradishonalmente nos tin nos enkuentro huntu den temporada di advent. Siman ku a kaba a toka na directie ku e konseheronan di maneho pa prepará e mainta di atvènt. Esta un dushi ambiente pa huntu ku koleganan tambe nos reflehá den union.

Anto nos tin un pesebre e aña aki atrobe, masha masha bunita mes.

Carl Pieterella a bolbe mustra su talentonan i a traha una beyesa pa hinka tantu nos ku ta aki den, komo tur nos bishitantenan den e ambiente di pasku. Pasa libramente bin tira un bista riba e obra di arte bunita aki.

Awe ta 8 di desember, dia di Maria Immaculata. Laga nos kòrda riba nos Mama Maria, ku a trese un yu pa nos na mundu.



Riba roster

Buena Vista,

Kolegio Nechi Pieters ta un dushi skol, situá den e barío di Buena Vista. Antes nos skol tabata karga e nòmber Santa Martha school. For di aña 1977 nos a haña e nòmber di un gran pintor Kurasoleño Jozef Cornelis Pieters, mihó konosí komo mener Nechi. No solamente mener Nechi tabata un pintor, pero e tabata tambe un bon maestro, ku a formá hendenan balioso den nos komunidad.

Komo skol ku ta karga su nòmber nos tambe ta para pa formashon di nos alumnonan pa nan bira personanan prepará i eduká den nos komunidad. Pa nan tin un formashon total, tantu spiritualmente, riba e aria sosial/emoshonal i riba e aria kreativo i kognitivo. P'esei nos ta hasi uso di diferente formanan pa logra nos meta. Dunando lèsnan na un manera kreativo, nos ta siña nos alumnonan den forma di wega diferente materia, Esaki nos alumnonan di grupo 1 te ku 4 a eksperensia, durante nan bishitá na museo di mucha, Akinan nos alumnonan a eksplorá hasiendo diferente wega ku vários material. Nan a gosa masha tantu..

Nos "Nechinan" ta gusta deporte I a bai partisipá na e torneo di "Goal 4 Kids". Aki nan por a traha den ekipo, dil ku nan emoshonnan i tene nan mes na regla. Nan a hasi esaki bou di e guia di nan "coach" Mello Martis.

Tambe e alumnonan di grupo 7 i 8 a partisipá nan e proyekto 1 focus diferente. E alumnonan a wak diferente "short films", kaminda nan por a siña i atkerí konosementu di kiko tin den e mundu rondo di nan. Ta un dushi eksperensia di mira kon e ta transformá nan manera di mira mundu.

Ora bo atkerí konosementu, semper bo mester hiba esaki den práktika. Nos alumnonan a traha un "greenhouse", pa yuda no solamente na e desaroyo ekonómiko den nan bario, pero tambe pa nan por kontribuí na un mundu mas bèrdè i biba di loke tera ta produsí. Nan a siña kon planta I duna demonstrashon na bario di Buena Vista. Habitantenan por a inskribí na nos After School Academy pa e proyekto Kunukito. Akinan partisipantenan por a haña konosementu básiko di tur material ku mester na momentu ku ta bai planta I tambe konosementu di diferente tipo di tera.

Pa amplia alumnonan su konosementu mas ainda, nos ta traha segun tema. Un di e último aktividatnan tabata Siman di kultura, ku e tema "E mucha krioyo". Dor ku riba nos dushi Kòrsou ta biba personanan di diferente nashonalidat a skohe pa e nòmber aki. Kada grupo a haña un pais, di kua nan por a bai siña mas di dje. E último dia den e siman di kultura tur grupo a bini huntu pa hasi un tremendo presentashon na su manera i na su nivel. E muchanan a gosa un bòl.

Semper nos ta perkurá pa traha huntu ku mayornan, ku bista riba futuro, luchando pa ekselensia. Ofresiendo alumnonan di 4 pa 12 e hèrmentnan nesesario pa por funshoná optimalmente den nos komunidad. Pa asina ta hòmber i muhénan ku balornan fuerte, honesto, amabel, disipliá, tolerente, servisial, curioso, kreativo i aktivo den nos komunidad.

Riba e pòtretnan nos ta mira klousura di nos siman di kultura na skon, ku e tema “E mucha krioyo.” Kada klas tabatin un pais, di kua nan a presentá baile, drama, kanto i duna informashon di e pais.

Tambe por mira nos alumnonan a partisipá na e torneo “Goal 4 kids” Kaminda nan por a demostra nan abilidadnan di traha den ekipo. Nan a logra esaki huntu ku nan coach Melo Martis. E wega a kaba 1-1.

Nos a bishitá ku grupo 1 i 2 na Museo di mucha, ku e meta pa nan bai eksplorá. Hasiendo diferente weganan, usando diferente materialnan, nan por a eksplora hungando.

Nos alumnonan di grupo 7 i 8 a bai bishitá e pelíkula 1 focus diferente, kaminda nan por a wak diferente shortfilms i siña di eksperensianan di otro i atkerí konosementu di kiko tin den e mundu rònt di nos.

Kòrda semper si bo ke un bon formashon pa bo yu i bo ta biba den Buena Vista òf bisindario, pasa libremente serka nos.









Mucha djispou

Tania ta riba barku anto ta sinti mareo, un waiter ta pasa serka dje pa wak kiko e hasi por. E ta puntra Tania: “Kiko nos hasi ku señora su kuminda? Señora ta komé promé, of mihó nos tire mesora den laman?”